

D' Feierwehr-Leich oder
s' Wiwerls Mißgeschick

A Traussauer Gschichtl.

- 1) A Gschichtl wöiß i(ch) va mein Vata her -
ban Dazüihln häut er main selwa lachn.
Er häuts dalebt als junga Bau(b)
s' gibt halt secha Sachn.
- 2) A Feirwehr-Leich woar wieda amal gwe(s)n
da Vata durft als Bou(b) mit bläusn,
er häut grad Trumpetn spüln glernt
u mecht' se gout, sou unter'n Gräuß(a)n.
- 3) U wia's halt woar nauch sua ra Leich
s' gi(b)t wos z'Trinkn u zan Essen
ban Hartla, ban Hütterer in Doinawitz drunt
u z'Traussa is d' Musikh nuch gesessn.
- 4) U gspült ham's fest in an Wirtshaus drin
un an Trauermarsch touns nimma denkn
s'Böia schmeckt u da Schnaps dazou -
langsam wolln's dann hoimzou schwenkn.
- 5) Mitto(g)ch woar scho lang vabei;
da alt Vetta häut d'gräuß Trumml gschlogn
sei'n Föiß, dei wolln halt nimma recht
dau hülft'n da Vata ban trogn.
- 6) Es woar a schäina Fröihlingsto(g)ch
d' Schläiha ha(b)m blöiht u d'Sunn häut brennt
d' Gäns ha(b)m Junga a scho g'hat
afra mal is da Vetta fast grennt.
- 7) Am Mühlberg äffa i's passiert -
an Vetta zwickts in an Bauch wöi wos
er mecht se ganz schnäll hinta a Stau(d)n
u setzt sua ebbas ins Gros.
- 8) Wie a firti(g) mit dian Geschäftla woar
dau brauchet er wos zan Wischn
a Tempo-Töichl häut er ja niat -
dau rup(f)t er Gros - u a Gans tout zischn.
- 9) Afra mäl dau woar a gräuß Geplärr
d'Gäns ha(b)m gschnottert u d'Junga san grennt,
da Vetta springt ganz gahling af
u häut a Wiwerl in da Händ.
- 10) In an Rausch dau haut er gaus niat gmirkt
daß er a Gansl haut dawischt
s'Wiwerl woar in an Gros drin gwest -
haut damit sein Hintern gwischt.
- 11) Nu - s'Malhör, dös woar halt g'schäh
s'Wiwerl rennt, wos nou lafn koua
da Vetta zöiht sa Housn hauch
u schwenkt mit da Trumml davou.
- 12) Sou woars halt z'Traussa näuch 'ra Feierwehr-Leich
s'Vetta's Nauma wüll ich niat nenna -
ich wollt dös Gschichtl Enk nu dazüihln,
s'koua sa(n), öina touts kenna.